

精鈔
大字

隨

園

全集

文集

八

大雅堂隨園全集卷之八

小倉山房續文集卷三十一

錢唐袁枚子才

湖南巡撫陸公神道碑

公姓陸名燿字朗夫。吳江蘆墟人。生即端慤。六歲受孝經論語。以古賢自期。乾隆壬申。舉京兆。補中書。入軍機房。以戶部郎中。補登州府知府。再遷運河道。按察使。權布政使事。母病。乞歸侍養。終喪。

天子命視運河。授山東布政使。湖南巡撫。裁一年。薨。公起家寒素。性淡泊。不慕寵榮。惟於仁賑惠物之事。朝夕宣究。多識前言往行。其守濟南也。上書徐中丞。請截留南糧。為積貯計。任河道時。上書總河姚公。請疏泉源。增修月河。作臬使時。以徒犯罪輕。請免解司。以省苦累。署藩司時。以流外壅積。請停分發。上皆是之。公風骨秀整。靜氣迎人。雖恂恂謙謹。造次必於儒者。而臨大事。則屹不可動。甲午。壽張縣王倫作亂。距運河甚近。人清淘淘。有欲閉城者。公不可。曰。寇未至。先閉城門。是示之怯也。且鄉民爭入城。何忍棄之。乃募鄉兵拒守。而身自坐城闌。彈壓稽察。賊知濟甯有備。不敢南向。已而王師奏捷。一城雞犬不驚。公在樞垣。倖直。至於日哺。猶不退。猝有急務立辦。以故大學士傅文忠公屢薦公。上亦知公深。凡巡幸處。俱令扈從。所奏察虧空事宜。及救荒策。俱蒙聖獎。臨終前一月。猶奏湖南社倉穀。

業已敷用其息穀請免征收奉 旨允行。批到日。方伯秦承恩捧劄子啟告柩前。慰公泉下愛民之心。時公已歿二十餘日矣。天子聞公薨。悼惜者再。嗚呼。以公忠誠。天子之恩眷。明良遇合。千秋一時。使再永其神明。以竟其用。其所敷施。必有更遠且大者。而竟扼以無年。壽止六十。有四悲夫。公事母孝。初選守大理府。再遷甘肅監司。俱以親老調近省。撫楚時。見屬吏有篤老親。猶來赴補。惻然憫之。奏官員凡親年七十。雖有次丁。俱終養。一時中外官歸養者千餘人。封公虔實先生。有清德。卓行。精八分書。與枚京師有交。甲辰冬。枚過長沙。公執後進之禮甚恭。曰。昔先人題先生乞假歸娶圖。某年十七。侍旁磨墨。不敢忘也。所著有河防要覽。甘薯錄。切問齋古文。朗夫詩集。若干卷。公三代皆以公貴。受二品封。夫人陳氏生三子。恩。受。綱。俱修飭。能守家法。孫六人。以丙午十月。葬公於吳江之東顧阡。公 予告時所自營生壙也。

銘曰。從來巨儒。行不迂拘。真嗜詩書。體用必俱。習習中丞。澹如粹如。內入 禁庭。吐納機樞。外任旬宣。東馳西驅。有力必抒。匪以狗譽。其義必為。匪欲功居。忽棄隼旟。歸奉板輿。若將終身。戢影蓬廬。天子思公。速下鋒車。曰。朕知汝。任大有餘。佐我邦家。赤子扶扶。公拜稽首。敢不免諸。東治河濟。濬其沮洳。南奠楚邦。矯解奇除。事繁力耗。恩重心懼。覆勉額額。卒以捐軀。朝野惋惜。吏民號呼。蒼蒼越山。瀾瀾駕湖。葬公其間。馬鬣龜趺。千秋過者。必式必趨。

董太恭人墓志銘

董太恭人王氏直隸豐潤縣人。生而婉孌明淑。不苟笑言。年及笄。來歸封公公纘先生。其時尊章在堂。正妻劉恭人當室。太恭人孝於姑。順於嫡。從禮無違。勛帥以敬。雖分居之。蔡里咸和。若穆羽之調。生兩子。而封公卒。其長君即令觀察也。當是時。太恭人年有三旬。觀察纔八歲。孀然一嫗。獨支門戶。內凌外侮。未免侮張。而太恭人能持大體。處之綽然。檢校分書。護持遺產。為子延名師。婚望族。凡家務之榮榮。大者無不畢舉。旁人聞之。疑封公之尚存也。亡何。次子又殤。太恭人進察觀而劾。泣之曰。汝弟亡。則吾與汝益孤矣。趁此年華。可不憂免前進報。國恩而揚先烈乎。觀察泣而志之。遂援豫工例。得同知引見。發皖江。歷署赤緊州縣。凡六處。題補安慶同知。在繁昌六安時。有水旱災。太恭人施棉衣百領。為紳士倡。恤獄囚飢寒。贈以錢米。觀察訊貴池盜案。其渠魁不刑而服。叩頭曰。盜雖不良。然疊荷太夫人恩。所以供詞無隱。不敢煩公心者。即以報太夫人也。其盛德之感人如此。未幾。觀察陞廣西思恩府知府。思恩瘴癘債興。觀察以迎養為憂。太恭人恬然不以為意。曰。從子禮也。生死命也。兒何所依違耶。遂同往。二年。歿於官署。觀察起復後。陞湖南糧道。調江安糧道。三署布政使事。嗚呼。以太恭人之神明。豈不知瘴雨蠻烟。非高年所慣。然決意驅車而相隨者。慮觀察乖離膝下。將母心殷。不能一意辦公。上報朝廷恩故耳。豈料身亡。不過數年。觀

察所蒞。皆聲明文物之邦。可以娛親。而竟不能烹武昌魚。飲建業水。供板輿。一日之歡。此臯魚風木之悲。古今同感。宜觀察之每一念及。而不禁淒然泣下也。太恭人天性仁慈。待奴婢如子女。然不忍答督。聞罪人呼號。常廢寢食。問決獄有所平反。則喜溢於顏。以故觀察之行事厚。居心寬。皆母教也。卒年五十有九子二。長世明。次世華。孫二人。以覃恩。誥封恭人。以乾隆三十八年閏三月二十六日。葬遵化州城東北莊。
銘曰。月孤彌明。松寒更清。從古甘臨之吉。皆由苦節之貞。惓惓恭人。為魯陶嬰。躬躬壽後。訓子成名。天道似遠。而非遠。地道無成。而有成。必報者善。動物者誠。貽謀者遠。聞風者興。卜茲元宅。安藏慈靈。峨峨綽楔。鬱鬱佳城。儲休啟佑。永蔭孫曾。

廣東惠州府知府李君墓志銘

河間有篤實君子曰竹溪李君。名崇。字召林。以壬戌進士。宰如臯元和豐縣。句容。上元。天長。合肥七縣。薦卓異。入都。遷大理寺評事。

天子召見。清問良久。閔其沉滯州縣二十餘年。裁博一薦。又入聞曹。非國家獎拔人才之道。特授廣東惠州府知府。君感格外恩。益奮勉思報。而以忤大府故。抵任未久。劾狗庇罷官。家居授徒。中風而卒。壽七十三。勤於為政。常言前案不清。後案又積。乃立摘案法。如幼時讀書。自為程課。十日必結。民咸便之。尤長治獄。如臯陳某販紅草不歸。其兄過張氏池塘。得

其尸。遂控塘主謀害。塘鄰姚德助其詞甚力。君厲聲曰。殺陳某者汝也。不必妄引他人。姚色變。脅以刑。乃云素善陳。知其身有驚女金。故乘醉而夜擠於塘。人問君何由知。曰姚有佯哀詐泣之狀。故疑之。而以恫喝得之也。句容賊王三。供與孔姓同偷。孔不伏。君不訊孔。而專訊王。乃悉其挾仇所教也。人問何由知。曰凡盜賊引人。往往不實。我先根窮原犯。使真情得。而後再訊所引之人。則思過半矣。原犯盜也。刑之非過。倘無辜氓。雖誤披其類。於心不安。而況加刑乎。官不可為賊所用也。上元滿營。小兒迷路。隨一跛者行。兒頭眩。跛者教飲井水。遂愈。街卒擒之。云以術迷拐人者。君笑曰。此寃也。彼果拐人。當挾以遠奔。而乃跣跣然跛行於市乎。且既迷之。又教飲水以解之。無是理也。街卒不服。訴制府。制府命與營員會審。跛者果良民。教飲水者。憐其暑暵故也。乾隆二十一年。江南米貴。句容奸民。聚眾萬餘。謀劫王貢生家。君單騎往問。爾等何為。答聲嘈嘈不可辨。君喚老成者前。有三人闖然出。曰無他。愚民求振耳。君曰。求振當在縣倉。不當在王貢生家。汝命眾人歸家。振即至矣。三人回顧麾其肱。眾皆星散。君知此三人創亂者也。命具姓名。至署領衆。旋即縛之。荷校以徇。合郡肅然。如臯有圻。江蘆課民疲於追。君力求莊中丞奏聞。奉

旨豁免。揚州至通州有舊河運鹽。泰州徐家壩。乃闌上河之水。使不下洩者也。墮敝百餘年。忽商人賄閹官。私開之。致上河水涸。民禾盡稿。君勘明下河。有七十二洞。原可通水。商不疏

通舊迹而罔民以取便請於大府勒碑永禁羣氓懽呼江寧通濟門外有教場甚寬中間旗人牧馬民田其旁亦百餘年矣忽奉將軍檄民佔旗地宜歸還滿營君請將軍發檔案以便辦治將軍曰此係旗員口訴無案可稽君即請棋員同大得三千三百餘畝周圍石柱有界外民田糧券鑿然棋員惶視無言將軍亦悔制府尹文端公聞而嘆曰言李令有德無才吾不信也余戊午試京兆與君同出廷尉鄧遜齋先生門下兩人意趣絕不相似初見亦落落難合交久覺君意思深長不忍決捨臨終謂其子曰袁公知我最深必以墓銘為託嗚呼二十年前已銘君之先人矣今又銘君君長余無幾而竟銘君兩代哀君之餘兼自哀焉所著詩集卷年譜一冊夫人氏子燧邑庠生効力四庫館好學善文能世其家以某年某月某日葬君於某

銘曰月蒼蒼涼涼而可親兮帛爰爰純素而有文兮惟其本納近斯仁兮惟其至誠故如神兮過貪泉而不酌甑生塵兮循莊達而不詭車折輪兮余不信為今之友而常疑為古之人兮嗚呼嗚呼此其墳兮他日九京誓從子以結鄰兮

周君少霞墓志銘

竹橋太史執訊來曰吾邑周君少霞病且革索某銘墓某謝曰子奇士非奇文不足以銘君為代請於隨園可乎少霞喜乃疾賦四詩並狀以來狀曰君諱昂江蘇常熟人從虞東顧先生學顧故經師疑疑自守君雖往習詩禮助校讐而意氣稠然不為繩約所羈學手搏法

能持挺闢白刃。兩目不眴轉。或挾惡少年遊狹邪。與倡優雜坐。狂歌酣顏。人諫之。輒謝曰。吾悔。吾改。未幾通湯如初。專趨人之急。遇難事。衆皆惶也。君獨奮任之。往往以智得解。以拔貢生得宣州同訓。宣州狄太守愛其才。善待之。涇令詹某罷官。虧倉穀二千石。後任李將揭報矣。狄不欲起大獄。召宣城張令。及合城諸紳士謀。相顧愕眙。最後召君。君至笑曰。是何難。吾未哺食。盍法覓羹啖我。與之食畢。徑驛馬馳去。狄亦不知其何往也。先是宣城前令盧某。欲以糶餘穀二千石。餽太守。託君關說。君知太守廉。拒之。至是直入盧所。謾曰。詹令有穀若干。借貽公倉。可速還渠。盧色然而駭。不解所謂。君徐道。詹令虧穀。有性命之憂。且曰。君前以官穀媚上官。私也。今以官穀還官倉。公也。一轉移間。人品心術。判若天淵。肯從某計。太守視公為何如人。盧大悅。服拱手曰。先生行矣。某即輦穀而往矣。君歸報狄。狄大喜。詹令聞之。闔門感泣。不五日。而兩任之事平。亡何以他事備劾。奉旨留任。嘻。君乃廣文微官。一彈指可去。而能受聖恩於格外。然則君之生平。匪獨人奇事奇。即遭際亦未嘗不奇。君雖跼蹐。而內行甚敦。事母與兄孝。周卹戚里。不使人知。君有用世心。原缺二字登賢書。六上春官不第。益侘傺。嘗病中強起。攬鏡悲呼。自投於牀。蓋猶有烈士暮年故態云。

銘曰。劍無芒難割玉。士不奇難拔俗。天生老周非碌碌。意欲先人孝侯逐。有才無命徒螻伏。中夜悲呼自指腹。抱此雄心老空谷。天卑其官薄其祿。更夭其子罰何酷。末路英雄惟一

哭殯於牀病已篤。曰墓銘須袁文作。我感其意不諾宿。急撰文成走急足。或未死前君一讀。長夜悠悠可瞑目。

誥授奉政大夫湖廣道監察御史蔣公墓志銘

乾隆四年。余春秋二十有四。受知於虞山蔣文恪公。主其家。得見用安蔣君。其時君以諸生為賓邸上客。每出城。則宿余家。兩人不飲。而好論古。折聖相對。凡三千年國家治亂。人才臧否。有所見解。動輒相合。拍几叫呼。以故益相得。家人聞君來。必治具濡蠟以待。亡何余改官江南。君在藩邸如故。又十年。余乞假入山。君舉士申鄉會。試入詞林。改官湖廣道監察御史。充貴州主考。隨丁內艱。服闋。過揚州。謁擁使某。某以上聞。遂挂吏議放歸。丁亥。兩江制府高公聘修南巡盛典。寓金陵一年。余得過從。如前時。懽君清標奕奕。目有青光。年雖高。善自修飾。雖戚里不覺其衰。每製衣。召縫人親為指示。衾前屈後。必合內裁。分寸不苟。治味如治文。精潔詣微。余聞君招輒喜。不多作詩。而洞悉甘苦源流。發一難必中欸。與遇才人後學。孜孜汲引。力雖盡。心猶未已。批點人落卷。教以宜讀某書。學某家文。以故治行時。被放者亦走送數百里外。曰此吾經師恩。勝座師也。晚年。以次子重耀攝蕭山縣事。就養於浙。適余遊天台歸。與君同飲。方司馬署中。漏沉月落。依依不去。隔四載。余再遊武夷過浙。而君先十日亡。嗚呼。歐陽公稱世之賢豪。不能常聚。理固然矣。然余果知便與君訣。又何難於

前去時小留。後來時早到耶。或者故人重逢。扶持酣喜。竟能生精神而延歲月。亦未可知。而今已矣。握筆銘君。五十年來。君之笑貌聲音。趨跪下泣。然不知涕之何從也。君名和寧。字用安。一字榕菴。行四。封公鎮。雍正元年進士。官松江教授。以古文名家。家本儒。素無擔石儲。而君天性闊達。輿服鮮明。坐客常滿。振枯粟乏族里。待以舉炊者。無慮十餘家。人知君貧。君不自知其貧也。卒年七十有八。夫人陸氏。先君卒。子齊耀。候選縣佐。重耀直隸州州判。孫二。長方增。次禮增。以某年某月某日葬某。所著詩文若干卷。

銘曰。高飛得羽。徐行失履。是運數之偶遭。非人生之自主。然而寧恢恢。毋蹢躅。雖中規。不踰矩。孔猶獵較。孟非貨取。率敦和而從天。羞谿刻以自處。善逸生故不殖。善樂生故不寢。苟九原之可作。微斯人吾誰與。

林君毅菴墓志銘

林君毅菴病革。語其子鎬曰。蘭園先生。工金石之文。汝所知也。我死。為我乞墓銘于先生。第先生集中所載。皆將相名臣。以我流外吏。廁其間。未知許否。已而君亡。鎬來。如其言以請。余道漢青翟為丞相。一事無聞。而王侯以功曹名聞千古。人傳不在位也。而翁有狀。既授我矣。我又奚辭。狀曰。君諱嘉俊。字墀賜。號毅菴。福建龍巖州人。寓居蘇州齊門之金鵝鄉。生有幹略。父克旋。服賈折閱。家無擔石之儲。君持錢負販。權其子母。走閩粵。營魯晉。楚吳越間。渡海越

山濱死者屢矣。卒以誠信動敏。累至萬金。循例入粟得州判。分發安徽。歷權丞倅。最後署六安州吏目。君嘗誦先儒言。雖匹夫苟存心利物。必當有濟。況有微權。薄秩者耶。以故勇於為善。乾隆

年。六安災。長吏欲減報災數。君不可。欲培克振糧。君又不可。長吏怒。欲中以危法。君不顧也。恤獄囚如家人。有楊德者。誤殺人。擬絞。君探知其母老。力請於州牧。援例留養。飢民募糧。長吏報盜。君爭不聽。卒以緝盜不力。鐫級罷官。治行時。民送於野。囚泣于獄。歸吳門後。悔幼不讀書。乃積卷軸。吟哦其間。門對十頃茶花。與村氓往返。夷然自得。生平強直自遂。行其心之所安。一切浮屠術。數陰陽。拘忌之說。彌口不言。嗟乎。國將興。聽於民國。將亡。聽於神。古之訓也。孔子與漆雕開論臧氏祖孫。以卜龜之多寡。定其三代之賢否。奈今之士大夫。官愈高。則拘忌愈甚。問卜益虔。其故何哉。蓋沉迷於富貴利達之說。而其中無所守故也。君雖不由科目進。而見理之明。遠過凡庸。余非君之銘。而誰銘。初娶謝氏。再娶何氏。子四人。孫一人。年七十五。以某年某月日葬於某。

銘曰。相傳繁昌有古生。孤憤獨居行經經。感君之恩。報不能。臨死諄諄。口作聲。願為君兒。君勿驚。其人素慕隨園名。向君稱說心尤傾。果然古死子鎬生。從遊於余。師事誠。輪迴之說。儒不稱。考之於古。恰有徵。蔡雍前世為張衡。羊祜金銀認得清。我故採拾為君銘。君當九原笑絕纓。

引稗史入銘詞。非古也。韓昌黎徐偃王碑。用王母瑤池事故。明知其非。而偶一效尤。自記
弟婦陳恭人墓表

香亭弟婦陳氏以香亭貴

誥封恭人。香亭守端州。歸恭人。薨於南昌。舟次香亭。權厝白下。逾

年。將卜葬祖塋。狀其事屬余表墓。余長香亭十五歲。恭人事兄公如尊章。知其賢尤悉。銘幽
之文。所不當得辭。按恭人名荊。字鈿如。廣西臨桂人。年十六。歸香亭。其父某。初以財豪。已
而折閱。先叔父與錢通。大有所負。叔父卒。世母食貧。歸咎恭人。詬誶時加。香亭又順親為孝。
牀第間隔越。若陌路。先慈及內子。絕愛憐之。代為不平。私相勸慰。而恭人安之若素。有暗泣
無顯對。媿媿然。如荼集蓼者。十有餘年。及香亭登進士。出宰河南。恭人侍世母之任。家有
兩弟。俱授室。世母覺兩婦之孝。不如家婦。家計又豐。待恭人漸有恩。而香亭亦深悔從前之
不善處家庭間也。補過修好。伉儷之篤。較常人倍甚。香亭作令時。有任俠名。恭人脫簪珥
助之施。揮霍數千金。往往傷患。余以為仁不勝道。心勿許也。甲辰春。余遊端州。居未一月。海
水暴至。城不沒者三版。香亭又以事羈番禺城中。文武官及諸災黎。知府署地高。爭挈眷
來奔。余意欲納之。恭人有難色。乃告之故。恭人欣然曰。此安所避。既守此邦。便與此邦人同
存亡。微伯氏言。妾固將納之。於是延貴者於內。安賤者於外。堂皇上頃刻炊烟四起。而內
署供頓之費。日亦不資。半月水退。始各歸其家。嗟乎。晉閉秦糴。許不弔災。古絕大諸侯。尚不

知吉凶同患之義而恭人以一女子獨能安行仁義若此此何如識力哉然後知高柔愛玩賢妻有終焉之志非徒燕婉之私有以見欽於君子也恭人性好靜不慕紛華常勸香亭急流勇退香亭是其言卒不得聞乙巳秋膺卓薦又因公左遷遂決志歸里置園金陵頗饒花竹而恭人不及見矣嗚呼有鸞妻勸隱之言無鸞妻共隱之樂中道乖分可哀也已恭人晚年病疇盲雖一無所見而處分家事益精當益靜極而慧生云生子安眾早殤撫妾生兩子一庚一端俱如已出卒年五十有四

原任江甯布政使內務府總管永公傳

公姓姚諱永泰字右菴正白旗漢軍人父三格官內務府慶豐司員外郎公生而端靜樸誠自矢於初入關老輩之風雍正三年以筆帖式保舉引見世宗命發湖南以知縣試用題補湘鄉調武陵遷辰州府永綏同知再遷辰州府知府永綏故苗地改土歸流之後獷悍未馴有聚衆械鬪者公將往治或請以兵從公不可曰兩苗私鬪非叛也臨以大軍彼必懼懼且合謀挺而走險矣乃袍而騎直抵其寨召兩苗歸曲責真諭以德威皆懇服感動炊雞黍獻公公即宿其帳中鼻响响其鼾遲明羣酋大悅吹簫笙送公跪滿箐谷終公之任民夷帖然九年王師征烏蒙調辰沅兵軍需檄下缺行糧一條公撥倉米運濟幕府猶豫慮難開銷公曰師行糧從國家制也倘有不贍我任其咎巡撫布公蘭泰嘉公知政體檄

各郡守如公所行。今上御極之元年。公以親老調補山東登州府知府。九年。奉請終養。部駁。旗員無此例。公泣涕五請。制曰可。嗣後八旗許養其親。皆從公始。回旗補內務府慶豐司員外郎。調茶庫員外郎。兼威安宮官學總管。十九年。服闋。授河南歸德府知府。尋遷河北兵備道。兼管河務。公到任。即跨一馬周度長堤。託宿爰舍。二十一年。秋。防陽武。夜。大風。公立堤上。驗水。漏盡歸寓。夢中聞有呼起者。急醒。呼燭。果報五堡決矣。公手絮衣鐵釜。馳往堵塞。泥污及胫。須臾。間水勢倒回。民以為神。公請於河督曰。頃所辦。確鼠穴耳。雖潰易塞。所慮者。河身日高。堤日卑。河自三門兩崖束。急怒而奔於孟縣之小金堤。衛懷二郡。正當其衝。歲下竹捷百萬。往往負岸而沒。殊覺可惜。為永遠計。請歲搶兩修。外加帑銀。以三年為率。每年增堤一丈。闊若干。需用丁夫。即以現在堡兵充數。每築轟破。兵較民夫尤熟。可使也。河督笑。公無病而呻。公頓颺曰。治水如治身。平時調養。原可無病。待病而呻。不已遲乎。卒不許。後任張公師載來。聞公議而是之。奏請。允辦。其年南岸崩。北岸安瀾。公之力也。薦卓異。引見。上召對良久。賜朝衣一襲。二十四年。授山西按察使。調四川。遷河南布政使。護巡撫印。再調雲南。其時緬甸頭目。有宮裏燕者。平時與緬子比肩事主。緬子弑主自立。燕不服。唱大義討之。反為所敗。乃率其屬來投孟連土司。孟連利其有欺其孤。令繳兵械。出口糧。尋又竄取其子女。燕妻攘占。素梟雄。心懷不平。時有報仇之志。故事苗俗。印信兵權。統歸妻掌。

號曰印娘。領軍臨陣。卒在夫先。調兵以帛箸為號。箸下則能食者行。帛下則掃境全出。二十八年秋。燕妻夜舉帛傳令。率麾下男女三千人。焚孟連署庫。滅其家。驅財帛牛馬而歸。猛良。猛良者。燕妻之母家也。燕多內寵。妻惡之。不與同宿。別居一帳。相離遠。故孟連滅而燕猶不知。內地官有貪功者。誘燕入關。誣其反。公聞大驚。亟詣督臣曰。孟連貪淫。被印娘賊殺。罪由自取。與天朝無干。請以實情具奏。天子聖明。必有處分。督臣先入貪功者之言。竟以叛聞。而戮燕於市。居亡何。燕妻唆緬子犯順。勞王師捷伐。明將軍忠烈公殉焉。人始服公之先見也。二十九年。調貴州布政使。再調江甯。兼織造龍江關稅務。在任二年。以老入都。補盛京佐領。又授泰陵總管內務府大臣。以兩次失物。私償未奏。引大不敬律。擬斬監候。在獄七年。卒。年七十九。公廉儉而慈。任方伯時。凡支收解給者。原收原放。不揭印封。廠課盈餘。給微員為薪水費。袍褶敗裂。補綴衣之出巡。儉從止三五人。權關稅不發囊篋。料簡征課。足額而已。東臬蜀中。姦民宋朝倫以邪教惑眾。從者數千。公殲厥渠魁。少所株累。有教主妻楊公姑者。未婚事發。公引律苦爭。擬流收贖。行棧道中。見赭衣婦而憐之。即具奏婦人秋審緩決。一次者可免解府。部議允行。遂永為例。守登州。奉檄查封閩撫王士任家產。藉其資。印立檔冊。仍給與家用。撫軍大怒。將劾以徇私。俄而奉旨賞還所封。公乃得免。官滿臨去。軍民送者牽衣嗅靴。造生祠。置酒攔馬。不能行。其得民心如此。然公雖善氣迎人。而義

之所在。強直自信。不知有風氣。有權要。并不知世上有周旋夤緣之事。江甯理事同知名按圖。以懃忤制軍。大計劾其老。公諫不從。乃聘其女為子婦。而資其歸。初宰武陵。受知於節相西林鄂公。夸非百里才。在江甯。受知於節相望山尹公。恨相見之晚。嗚呼。此二公者。皆君子也。惟君子能知君子。公之為人。蓋可想矣。初娶 氏。再娶 氏。子二人。明新明華。俱舉京兆。以能文世其家。

論曰。公官中外四十餘年。思吏勸民靡所不施。不可謂之不遇也。乃衰年終請室中。雖蒙聖主矜憐。獲保首領以沒。而論者覺惠迪之報。尚未盈量。豈古人慎毋為善之戒。竟為公設乎。不知記有之曰。與人同功。其仁未可知也。與人同過。然後其仁可知也。公之過。天欲發露之。以大彰其仁。故不得不加摧折。猶之旃檀之香。非燒灼不能遠聞也。公之末路坎坷。或以是哉。

江西督糧道省堂沈公傳

君姓沈。諱榮昌。字永之。一字省堂。湖州竹墩人也。祖沆。督學閩中。以清節著。父柱臣。宰廣東。因事被逮。君年甫十七。騎驢入都。歷險難。脫父子罪。以進士出宰山西文水縣。朔州知州。懷慶府知府。甫抵任。而河決。君率兵役宿危堤。三晝夜。板幹畚築。萬手齊下。水稍平。乃踰雉堞入城。開倉撫恤。民以救盜。丁艱起復。擢守蘭州。調鞏昌平涼。遷陝西糧道。再丁艱起復。補